

A man in a light blue shirt is diving underwater, surrounded by a large school of small fish. A large whale is visible in the lower left corner. The scene is set in deep blue water with light filtering from the surface.

JONA

le Leruarua

MAPULA MARTHA MALATJI

Diswantšho ka Jonanda Kannemeyer

JONA LE LERUARUA

© 2023 One Heart
Kgatišo ya pele 2023
E gatišitšwe Afrika Borwa
ISBN: 9781776476046

Puku e ka phatlalatšwa ntle le tefo, efela go kgahlanong le molao go e rekiša. Puku e humanwa go www.oneheartforkids.co.za.

Ka tumelelo ya bagatiši, puku e ka abelanwa ka go gatišwa, go fotokhophiwa goba ka mokgwa wa eletroniki. Puku ga se ya swanela go fetolwa ka mokgwa ofe goba ofe. Go kgopela tumelelo ya go gatiša puku o ka ikgokaganya le bagatiši.

One Heart
17 Pelikaan Street
Stellenbosch, 7600
South Africa
www.oneheartforkids.co.za

Mongwadi: Dr. Mapula Martha Malatji
Mothaladíswantšho: Jonanda Kannemeyer
Morulaganyi: Elizabeth Phala
Motlanyi: Imprint Publishing

Dikanegelo tša Beibele

TESTAMENTE YA KGALE

JONA 1-4


JONA

le Leruarua




Mehlang ya bogologolo, go be go na le monna yo a bitšwago Jona yo a bego a dula lefelong leo le bitšwago Isiraele. Modimo o ile a botša Jona gore a iše molaetša go batho motseng wo o bitšwago Ninife, eupša Jona o be a sa nyake go dira seo. Ka gona o ile a phetha ka go namela sekepe gomme a tšhabe Modimo.

Ge Jona a be a le ka sekepeng, ledimo le legolo le ile la tšwa kae le kae. Basesiši ba sekepe ba be ba tšhogile kudu gomme ba rapela medimo ya bona, eupša ga go selo seo se ilego sa thuša. Ba ile ba lemoga gore Jona ke yena a bakilego ledimo, ka gona ba ile ba mo lahlela ka lewatleng gore sekepe se se ke sa nwelela.



Ge Jona a be a lahlelwa ka lewatleng, leruarua le ile la mo metša. Jona o ile a ikhwetša a le ka gare ga mpa ya leruarua. Go be go le leswiswi, go nkgā, ebile go tšhoša ka kua. Jona o ile a rapela Modimo a le ka gare ga leruarua, a kgopela tshwarelo gomme a holofetša go dira bjalo ka ge Modimo a kgopetše.


Modimo o ile a kwa thapelo ya Jona gomme a dira gore leruarua le mo tshwele ka mare nageng e omilego. Jona o ile a leboga kudu moo a ilego a phetha ka go ya Ninife gomme a fetiše molaetša wa Modimo ka morago ga tšohle. Molaetša e be e le gore batho ba Ninife ba be ba swanetše go fetša ditsela tša bona tše kgopo, go sego bjalo Modimo o be a tla ba otl.



Jona a iša molaetša Ninife gomme ba theeletša, ba dumela go Modimo. Ba ile ba phetha ka go fetoša ditsela tša bona, gomme ba rapelela tebalelo. Gaešita le kgoši ya Ninife e ile ya kgothaletša bohle gore ba sokologe.

Ka ge batho ba Ninife ba ile ba furaletša ditsela tša bona tše kgopo gomme ba kgopela tshwarelo go Modimo, Modimo o ile a ba kwela bohloko gomme a phetha ka gore a ka se ba otle. Se se ile sa befediša Jona ka gobane o be a nyaka gore Modimo a otle batho bao ba tšwago Ninife. O ile a ya ka ntle ga motse gomme a dula fase, a ikwa a nyamile.





Ke moka Modimo o ile a dira gore sebjalo sa matlakala se gole gore a nee Jona moriti, e lego seo se ilego sa mo thabiša. Eupša letšatšing le le latelago, Modimo o ile a roma seboko gore se je sebjalo seo, sa dira gore se pone. Jona o ile a befelwa le go feta ka baka la go lahlegelwa ke moriti.

Modimo a re go Jona: “Na ke tshwanelo gore o galefe ka sebjalo?”

Jona a re: "Ke yona." "Gomme ke befetšwe kudu ke duma ge nkabe ke hwile." Eupša Morena a re: "O be o tshwenyegile ka sebjalo se, le ge o sa se hlokomela goba wa se godiša. Se ile ya hloga bošego bjo tee gomme sa hwa bošego bjo tee. Naa nka se tshwenyege ka motse o mogolo wa Ninife, wo go wona go nago le batho ba dikete tše fetago lekgolo le masomepedi le diphoofolo tše dintši?"





Thapelo

Morena yo a rategago, hle re thuše go latela leano la gago, le ge re sa nyake, gomme re kgopela o re thuše go swarela ba bangwe go swana le wena. Le rena o re swarele.

Dipotšišo

1. Naa Modimo o be a romile Jona kae?
2. Goreng Jona a be a gana go romiwa ke Modimo?
3. Nke o rapele thapelo ya ge o ka ikhwetša o le bothateng.
4. Modimo o romile eng go ja sebjalo sa moriti?
5. Molato wa batho ba Ninife e be e le eng?

Ngwanenyana wa go tšhaba sekolo

Ngwanenyana Letletše o be a sa thabišwe ke selo ka tša sekolo. O be a šetše a lemogile gore ka phapošing ya borutelo go na le bana ba bangwe ba go se tle sekolong ka mehla eupša morutiši ga a ba dire selo. A hwetša letšhoba la go tšhaba sekolo. A dira gore le tatagwe e bego Molepa le Mmaletšatši mmagwe ba se lemoge selo.

A gopola go khuta ka fase ga mpete ka mehla e ka re o ile sekolong. Batswadi bona ka ge e le barutiši ba be ba ikela mešomong ka mehla. Ge ba bowa fela, Letletše o be a etšwa a itshwariša pukunyana mo nkego o a ngwalangwala, morago a hwetše dijo tše di bose. Ge Letletše a šetše a tlwaetše go tšhaba sekolo, a tšwela tseleng tšatšing le lengwe mo a kopanego le pudi ya go kgona go opela, ye e bego e ehlwa e mmona ka mehla. Ka gore kgwedi e be e šetše e fedile, pudi ya hwetša mošomo wa gore e opele tseleng ka mehla le mehla go begela batho ka mokgwa wa ngwanenyana yo.



Ba ba e kwelego pele ba ya go botša ba bangwe ka go opela bjalo ka pudi. Napile motse ka moka wa thoma go opela koša ye. Sekolong ge e opelwa, barutisi ba begela Molepa le Mmaletšatši. Batswadi ka go kwa bohloko, ba tšea dipuku tša Letletše go lebelela gore mešomo ya sekolo tšatši ka tšatši e sepela bjang.

Ge a bona batswadi ba lla, le yena a thoma go lla ka go itshola. A ba tlhalošetša ka moo a hloilego dithuto tša go gapeletšwa. Ba mmotša gore thuto e bohlokwa mo bophelong. Tatagwe a re “Bona ngwanaka, nna le mmago, re tsene sekolo, re barutiši, wena o ka kgona go ba ngaka ya dithuto goba ya bookelo.” Batswadi ba thoma go mo iša sekolong ka mehla. Moo a bego a sa kwešiše ba be ba mo thuša ebile ba mo okeletša ka wo mongwe gore a se ke a nyatša thuto.

Sekolong ba thoma go fetola mekgwa ya bona ya go ruta. Ba thoma lenaneo la go laletša batswadi morago ga dikgwedi tše tharo go tla go boledišana le bona ka dithuto tša bana. Letletše a kgethwa go ba mongwadi wa maina a ba ba tšhabago sekolo ka phapošing ya borutelo. Gwa rena khutšo magareng a bana, batswadi le barutiši. Pudi yela yona ya iša pele ka go ijela ditlakala.



Thapelo

Tate wa magodimong, ke a leboga ka go nnea pelo ye mpsha ka teng ga ka gore ke rate thuto ya gago gobane ke yona seetša.

Amen.

Dipotšišo

1. Letletše o thomile ka go dira eng mola a sa ye sekolong?
2. Naa ke gabotse ge Batswadi ba gago ba lebelela mošomo wa gago wa sekolo? Ka baka la eng?
3. Molepa o rileng go Letletše?
4. Pudi ge e feditše mošomo wa go opela, e ile ya dira eng?
5. Ge ka geno go ka ba le pudi ya go opela o ka e rata? Goreng o re bjalo?
6. Re tseba bjang gore Letletše o ile a kaonafala?


Mantšū a maswa

Basesiši = basepediši

Mpete = bolao

Leruarua = hlapi ye kgolo ya lewatle


Jona le Leruarua ke ye nngwe ya dipuku tše 20 tše di bontšhago dikanegelo tše 10 tša Testamente ya kgale le tše 10 tša Testamente ye ntshwa, moo ye nngwe le ye nngwe ya tšona e nago le ditiragalelo-maphelong, di ithekgile ka tša Beibele.



Puku_1



Puku_2




Puku_3



Puku_4



Puku_5




Puku_6



Puku_7




Puku_8




Puku_9



Puku_10



Puku_11




Puku_12



Puku_13



Puku_14




Puku_15



Puku_16



Puku_17



Puku_18



Puku_19



Puku_20

Jona le Leruarua

Pukung ye re ithuta gore le ge re ka leka go tšhaba merero ya Modimo, o tla re bušetša gape tseleng ya nnete.

Ngwanenyana wa go tšhaba sekolo

Kanegelo ye e re lemoša gore ga go selo se se ka khutišwago sa se tsebiwe. Modimo o kgona le go šomiša diphoofolo go thuša batho.



9781776476046

Sepedi